

Nur Jazlan Alu-alukan Mana-Mana Individu Tanding Ketua Umno Bahagian Pulai Bernama
13 Sept, 2013

JOHOR BAHRU, 13 Sept (Bernama) -- Ketua Umno Bahagian Pulai Datuk Nur Jazlan Mohamed mengalu-alukan mana-mana individu yang berhasrat mencabarnya pada pemilihan bahagian kali ini.

Katanya keadaan itu menunjukkan demokrasi sentiasa subur dan juga memberi peluang kepada anggota Umno bahagian untuk menilai dan memilih barisan pemimpin terbaik.

Beliau juga berharap ada pemimpin muda tampil bertanding dalam pemilihan bahagian itu untuk menjadi pemimpin pelapis.

"Kalau hanya muka lama yang bertanding ia memberi isyarat yang kurang baik seolah-olah Umno Bahagian Pulai kekurangan dan ketandusan barisan pemimpin pelapis," katanya kepada Bernama di sini Jumaat.

Nur Jazlan mengulas kenyataan bekas Anggota Dewan Undangan Negeri (Adun) Kempas Datuk Osman Sopian semalam yang menawarkan diri untuk mencabarnya pada pemilihan bahagian kali ini.

Kali pertama Osman mencabar Nur Jazlan adalah dalam pemilihan bahagian pada 2008 yang menyaksikan Osman yang ketika itu Timbalan Ketua Umno Bahagian dan Adun Kempas kalah.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=977471>